

續  
文  
獻  
通  
考

續文獻通考二百四十二

皇明進士雲間王圻纂輯

仙釋考 道家姓氏中

唐

王知遠系出瑯琊母夢鳳集其身有孕幼聰悟通書傳得  
陶弘景術為道士陳後主隋煬帝嘗執弟子禮太宗時  
詔即茅山為觀久之忽謂弟子曰吾今署少室仙伯將  
行即沐浴衣冠苦寢而卒壽一百二十六歲遺命子紹  
業曰爾年六十五見天子七十見女君調露中紹業奏  
其言高宗追贈大中大夫謚升真先生武后又贈金紫  
光祿大夫改謚升玄

魏隆貞觀中石至京太宗悅之屢垂清問後居潤之仁靜  
觀卒葬于鳥跡山

薛順滑州人隋時為道士武德初直秦王府密語曰德星  
舍秦分王當帝天下王表為太史令太宗時固丐為道  
士帝為築觀九梁山號曰紫府拜順大中大夫往居之  
即祠建清臺候辰次災祥以聞所上與太史李淳風合  
數歲卒

苗龍唐初人失其名能畫龍人以苗龍呼之後得道仙去  
今慶州瑞龍宮東南一峯上平如砥相傳苗龍上昇處  
匡智長安人貞觀中棄妻子與姪大即適廬山修道居七  
日有老人曰廬山陰地仙不可得南有名山陽地可往

居之乃至吉州望見義山其山神化為樵夫引入山中  
曰此處安穩遂立壇脩行數年忽有神人降智拜之但  
見足下雲生上升而去大郎亦為地仙

張惠明趙郡人結廬中條山遇混元子授高上之道行之  
道學超群太宗詔入內殿致醮有感封妙濟大師尋至  
西嶽尸解

瞿夫人豫章人隋末兄為辰州刺史有黃元仙者亦自豫  
章來見瞿君高其行以夫人妻之後薦其才德以自伐  
隋末元仙棄官與夫人隱于州西之羅山貧甚為人傭  
織以養其姑如此者十年一日忽謂元仙曰昨日聞帝  
命當與汝別俄頃化為青氣數丈騰空而去

羅通微臨晉人少時采薪山中遇關使君宋謂曰子骨相  
嶢峩可學長生遂避迹五老山學步虛絕粒貞觀中忽  
一日謂人口我歸明日大會士庶萬人俄雷震地下青  
龍躍出通微躡蹻而登仙

謝自然蜀人貞觀中女冠也嘗泛海將詣蓬萊見道人指  
言天台山司馬子微名在丹臺身居赤城真良師也自  
然乃回師子微得道術後于金泉山白日上昇是夕郡  
郭有虹霓雲氣之狀萬目共覩一曰焦靜貞

王仙柯青城人儀鳳中拔宅上升蜀僧中寤偶于龍岳相  
逢寤公曰飛升之後胡為來此仙柯曰吾昔得靈藥令  
能飛步今全家隱于後山更修道法上賓之命吾何望

焉

劉道士高宗時人合還丹成而上之咸亨中卒惟有空皮  
背上開拆似蟬蛻

李清比海人開皇四年嘗入雲門山窟仙人授書一軸甫  
半日歸視其城郭人民屋宇皆變無一相識者訪其子  
孫皆云常入南山不知所終時為永徽元年開所授書  
視之乃小兒醫方療之立愈齊魯間從學道術者甚衆  
後入泰山莫知所終

明崇儼洛州人少隨父令安喜吏有能召鬼神者崇儼盡  
得其術以奇技自名高宗召見甚悅試為窟室使宮人  
奏樂其中召崇儼問何祥耶為我止之崇儼書桃禾為

符置室上樂即止曰向見恠龍怖而止盛夏帝思雪  
坐頃取雪以進自云徃陰山得之四月帝憶仄崇儼索  
百錢須臾以仄獻曰得之絳氏老人圃中帝召老人問  
故曰埋一仄失之得百錢

尚獻甫衛州汲人武后召見由道士擢渾儀監令長安二  
年熒惑犯五諸侯獻甫自言當死武后為還水衡都尉  
以厭之已而竟卒

司馬承禎字子微洛州温人事潘師正傳辟穀導引之術  
隱居桐栢山構層軒于壇上號白雲子又嘗煉丹于台  
州內方山後人名其村曰馬仙村則天時屢召不起睿  
宗延問治國治身之術荅語稱旨欲加寵位固辭而歸

後開元中文靖天師與承禎赴長生殿千秋節齊直中  
夜行道畢隔雲屏各就枕斯須忽聞小兒誦經聲玲玲  
如金玉天師窺之見承禎額上有小口如錢光曜一席  
逼而聽之乃腦中聲也天師還語其徒曰黃庭經云泥  
丸九真皆有房方負一寸處此中又云左神公子發神  
語其先生乎有弟子七十餘人先期告終忽若蟬蛻弟  
子歛空衣塋之時年八十有九詔贈銀青光祿大夫謚  
貞一先生

蘭沖虛涪州人唐時居精思觀神龍乙巳秋乘雲土汴  
楊昭慶景龍中自京兆來志尚清虛巡遊二十四化至北  
平化嘆曰昔漢時史先生得貞一之道修之已白日升

天後無繼者乎遂住青神縣遊仙觀三十餘年感五嶽丈人希受真君降下授以朱明龍文得尸解之道

許宣平歙縣人景龍中隱于城陽山南塢絕粒不食顏如四十許人行及奔馬時負薪買于市嘗獨吟曰負薪朝出賣沽酒日西歸借問家何處穿雲入翠微乎白入山尋之不見乃題其庵以歸是冬庵為火所焚遂不見後百餘年至咸通七年有採薪者見之南山石上

魯妙典九疑山女冠也有麓林道士授大洞黃庭經入九疑山十年白日升天

何仙姑廣州增城縣何泰之女唐武后時住雲母溪年十四五一夕夢神人教食雲母粉可得輕身不死因餌之

誓不嫁嘗往來山頂其行如飛每朝去暮則持山果歸遺其母後遂辟穀言語異常武后遣使召至闕中路失之中宗景龍中白日昇仙玄宗天寶九載都虛觀會鄉人徐有五色雲起于麻姑壇衆皆見之有仙子縹緲而出道士蔡天一識其爲何仙姑代宗大曆中又見身于小石樓廣州刺史高暉具上其事于朝陵云何仙姑零同有六王所居地產雲母有異人教餌之年十三入山採茶走歸路遇呂洞賓食以桃指示歸路景龍中仙去按呂洞賓貞元中生則仙始創洞賓之先所傳多妄

宋類苑曰潭州夏鈞嘗過永州問何曰世多言呂先生今安在何笑曰今日在潭州興化寺設齋鈞到潭日取寺中齋曆視之其日有華州回客設供

孫思邈京兆華源人周獨孤信稱為聖童隋文帝以國子  
博士召不拜密語人曰後五十年有聖人出吾且輔之  
太宗初召請京師欲官之亦不就嘗言心欲小膽欲大  
行欲方智欲貞永寧初卒年百有餘歲孫處約以諸子  
見思邈曰俊先顯侑晚貴佺禍在執其後皆驗又謂盧  
齊卿曰後五十年位方伯吾孫為屬吏時思邈之孫溥  
尚未生及溥為蕭丞而齊卿為徐州刺史天寶初思邈  
導行雲至庭墀求賜武都雄黃勅遣中使往賜至中山  
不知其棲隱因置之巖上煙香宣詔俄見其形謂使者  
曰但留雄黃自取之石上有朱書謝表旋錄旋沒今峨  
嵋縣有呼應臺

張果隱中條山往來汾晉間夏居五積山冬居鸛鷺山得  
長生秘術武后遣使召之即死後人復見恒山中玄宗  
遣中舍李嶠賁重書邀迎乃至舍集賢院有輿入宮嘗  
取董以飲果三進頽然曰非佳酒也乃寢頃視齒焦縮  
顧左右取鐵如意擊之墮藏帶中更出藥傳其斷良久  
齒已生粲然駢潔帝益神之帝親問治道神仙事欲以  
玉真公主降之固辭還山號通玄先生果在趙州嘗騎  
白驢休則疊之如紙置巾箱中乘則以水嚙之復成驢  
矣嘗過安濟橋驢迹尚存卒時或言尸解帝為立棲霞  
觀于其所

邊洞玄棗疆人自幼于紫雲觀出家修行後得道白日上

昇玄宗御製詞褒揚之碑刻尚存

葉法善括蒼人世為道士嘗遊白馬山石室遇二仙人授以正一三五之法能厭劾鬼妖嘗在東都凌空祠為壇以祭都人悉往觀有數十人自奔火中衆大驚救而免法善笑曰此為魅所憑吾以法攝之耳問而果信病亦皆已高宗召詣京師欲寵以官不拜睿宗時拜鴻臚卿封越國公玄宗嘗問四方元夕何處極麗法善曰無踰廣陵俄而虹橋起于殿前帝步而上太子及高力士等從俄頃到廣陵見陳設之盛燈火之光皆仰望曰仙人見于五色雲中帝大悅勅伶官奏霓裳羽衣一曲數日廣陵果奏其事開元八年卒年一百七歲贈越州都督

未一年棺開尸化

王遠知台州人善易知人死生禍福作易總十五卷世秘其本一日曝書于庭忽卧內雷殷殷然赤電繞室一老人下叱遠知怒曰所洩者書何在上帝令吾追取頃曰上帝勅下汝仙品已及壽期二十四年遠知拜命

張胤晉州人號洪崖子隱姑射洞中仙書秘典無所不通開元中玄宗召問曰先生善長孺可得聞乎即應聲而發拜官不受還山絕粒服氣洪州大疫有狂道士市藥病者立愈玄宗聞之意必胤果然三召不至天寶末忽大霧尸解乾元中詔立應聖宮奉肅宗以胤配焉

張志和湖州人號玄真子嘗歌漁父辭曰青箬笠綠蓑衣

斜風細雨不須歸後于刺史顏真卿坐上雲鶴翔集飛  
升而去

黃華姑臨川人姓黃名令微修道于井山年八十餘顏如  
處子時人號黃華姑開元中尸解刺史顏真卿撰仙碑  
載其事

趙雲容開元時內人嘗問申元之乞延生藥元之與絳雪  
丹一粒曰服此雖死不壞百年復生至元和末果再生  
鄧紫陽臨川人名思瓘隱麻姑山中開元末感虎駕雷車  
之異奄忽而化靈昌太守李邕作碑記其事

羅公遠衛輝府人一云鄆人善于隱形明皇秋宴取杖向空擲  
之為大橋與遊月宮仙女數百素練寬衣舞霓裳羽衣

曲帝密記其調遂回顧其橋隨步而沒後求其術不行  
怒而殺之使者自蜀還以當歸為寄曰于此候駕明皇  
疑之發塚啓棺止存一履移塋衛地後幸蜀方悟當歸  
之義

許碁自稱高陽人少為進士累舉不第後得道于峨嵋山  
嘗遊江淮間吟曰閨苑花前是醉鄉拈翻王母九霞觴  
群仙拍手嬾輕脫謫向人間作酒狂

王旻居洛陽青羅山鄉里見之已數百歲開元中召至京  
待以優禮復遣從李元靖求補仙書還請歸舊山不復  
入城嘗與達奚侍郎往返死後猶杖屨詣達奚人始知  
其尸解云

僕僕先生居汝南黃土山嘗餌杏丹乘雲往來刺史李光休以為妖叱左右執之龍虎見于其側先生乘之而去天寶初因以仙居名縣今為羅山縣

哲法師太原人母曹氏夢日光滿室有娠及生有過人才名重當時武后臨朝屢徵不起開元間示化于福壽寺王虛負東明觀道士以符籙得見玄宗帝頗重之俾為道門威儀翰林供奉賜紫令監領諸道士及卒贈洞微先生

申泰芝洛陽人其母夢吞芝而孕故名與玄宗同誕日嘗遊南嶽遇異人授金丹術後居佘湖山修煉玄宗夜夢湖南有白雲居士因召至京師言論契合賜號大國師

住京師玄真觀歷著顯異白晝冲舉宋封玄妙靈修真人

蔡如金泉州人天寶中為太原守棄官歸居清源洞修真煉法勅賜靈應先生

丁公著不知何所人三歲喪母七歲見鄰嫗抱子哀感不肯食請于父緒願絕粒學老子道父聽之

薛昌荊都人為道士天寶中棲止于蜀之青城洞天觀忽得商陸酒飲之耳鼻血流死經三日屢然而蘇身輕目明勢欲輕舉遠近節度使延至賓館欲送至京師忽失所在

陶八八肅宗時道士嘗以丹授顏真卿後為李希烈所害

此尸解中名曰劍解

黃洞源武陵人大曆間學道于桃源宮辰州霍伯庭走武陵師事之尋遇一老尊遂辭洞源曰歸山去洞源留之不可約十八年再見後洞源往潤州之茅山伯庭忽至洞源曰吾將歸滄海次日亦化溫造為記其事于桃源宮一云伯庭幼時因戲躍入井中後自大酉華妙洞中出依善卷祠修道功成止桃源宮久之昇仙而去

桑道茂者失其系望善太乙遁甲術乾元初嘗卜相州九節度之敗後召待詔翰林建中初請大城奉天朱泚之亂得以免後詣李晟預求判免死狀且以已縑願易晟衫為信後果汙朱泚偽官晟平賊執道茂將刑出衫及

書以示晟乃免之其餘決人壽夭禍福甚衆

俞靈璣河間人入衡山九真觀修道十餘年南嶽帝君授以回風術行之二十年能坐見天下事如在掌中然自晦不為異以驚俗憲宗元和中林州官吏見其談說始驚異之即曰我偶然耳非有知也遂閉關不出後入九疑山絕粒

商棲霞歷陽人大曆中居于白石山下彭仙洞善吐納之術絕粒三十年

施肩吾分水人元和中舉進士退隱洪州西山終身不仕後遇旌陽授以丹方仙去所著有文集十卷

李珣廣陵人以販糴為業每斗惟求利兩文以養父母有

耀與耀即授以升斗令自量丞相李珣節制淮南夢入  
洞府見石壁填書姓內有李珣字方自喜有二仙童曰  
此乃江陽部民李珣耳卒年百餘歲

吳善經縉雲人權德輿集有故大清真宮三洞法師吳先生  
碑銘曰先生族系于東吳築室于仙都演道于明庭棲  
神于太清隱機于開元歸根于靈仙其來適然其去寥  
然

王希夷徐州人隱嵩山師黃頤養生嘗餌松栢葉雜華年  
七十餘筋力柔強

韓湘子字清夫愈之姪愈教以習經術應舉對曰姪所習  
與叔異問所習何事曰解造逖巡酒能開頃刻花愈令

試之湘子乃取一盆實以土須臾出牡丹花一朶紅艷  
異常花瓣中有金字詩一聯曰雲橫秦嶺家何在雪擁  
藍關馬不前愈問此何意曰久自知之後愈貶潮州過  
藍關大雪不能進而湘子忽至爲掃除其雪愈方悟花  
中詩意乃爲八句足成之湘子作別公詩云才爲世用  
古來多如子雄文世孰過好待功名成就日却收身去  
卧烟蘿公別湘詩云舉世多爲名利醉伊予獨向道中  
醒他時定是飛昇去衝破秋空一點青公慮處瘴毒難  
以生還湘子出藥與之曰服一粒可禦瘴氣且告公不  
惟舉家無恙還當復用于朝後皆如所說

軒轅集羅浮山道士武宗嘗召入殿庭問長生術集對以

屏欲崇道自然受天遐福乃復還山

劉元靜武昌人為道士師王道宗道宗仙去元靜感悟遂入南嶽鑿石穴以居絕粒煉氣敬宗召入思政院問長生術尋放歸山武宗復召入禁中受法錄賜號廣成先生還山宣宗時忽聞天樂浮空而去惟杖屨存焉

呂品字洞賓蒲州永樂縣人貞元天寶十四年四月十四日巳時生生時異香滿室天樂浮空有白鶴飛入帳中忽不見生而形貌異常資性敏悟馬祖稱當為神仙中人他時遇廬則居遇鍾則扣後會昌中兩舉進士不第遊廬山遇火龍真人授天遁劍法又于長安酒肆遇鍾離權十試而授以金丹大道遂成仙時遊湘潭嶽鄂及

兩浙江淮間出入隱顯人莫之識間亦微示其姓如兩  
甕兩甕口口相授回心回道入守谷客無心冒老無上  
宮至皆去後人始悟為呂仙也以四月生號純陽真人  
潘老人不知其名元和中嘗因風雨求宿于嵩山少林寺  
二更後僧入忽起見火明乃老人屋內設茵褥翠幕陳  
列布饌飲嗽自若衆伺之至五更老人睡起取一胡盧  
大如拳將牀席帳幕器用悉納其中置懷內而去

侯道華芮城人或云自峨嵋山來詣中條道靖觀事周悟  
仙恒如風狂人登危歷險如履平地又好子史手不釋  
卷因殿宇壞登梁葺之得小金合中有丹吞之後上松  
樹巔與雲鶴盤旋凌空去時宣宗大中年也

毛仙翁名于磐字鴻漸不知其甲子常如三十許人周遊  
湖潁間嘗以丹石攻疾大中戊寅歲進士張為遊長安  
一旦有青衣來奔納之寢成羸疾骨立待時毛翁自海  
陵來見之曰子妖氣和光浹遍肌膚可不相植殞命旦  
夕矣吾有鮑南海丸可佩之張佩賜數百步張之妾望  
見長號一聲蹙然而斃因共視之木偶人也心下至足  
肌肉如人心上至頂猶木偶之狀乃棄之江中又以丹  
砂如黍三粒命張吞之旬月間瘵疾頓廖仙翁後上昇  
而去

杜光庭縉雲人咸通中進取不利入天台山學道應制為  
道門領袖僖宗時從幸興元後隱青城山號荅籙子王

建封為廣成先生卒年八十五人以為尸解有文集百卷

劉德本鄂州人好古多能往來大江商販乾符中大饑散米數萬石活饑民黃巢亂避地五老峯下一日有鹿裘道者來訪因把臂入深澗忽見老人曰可同到後院丹壁煥曜老人曰此泳真洞天也以汝行善故許到此遂不見道者曰爾籍名仙錄相別而去德本後徧遊名山一日彩雲環遶白日飛昇人呼劉仙翁云

爾朱洞少遇異人得道懿僖間抵蓬州客安漢館張氏十二年或落托成都市中常于江濱取白石投水驗其浮沉衆莫測後費丹于市價十二萬刺史召問其價更增

十倍惡其惑衆命縛之沉于江二漁人得之釋其縛二  
漁人曰我白石江人洞曰師謂吾遇三都曰石浮水乃  
仙去殆此地耶二漁人投以丹三人白日昇天而去宋  
張商英爲作傳

廖師郴州人懿宗召入道術有驗後乞歸山韓愈嘗送以  
文後于靖福山白日昇天

應靖不知何所人僖宗時爲登封令棄官學道隱其姓故  
世稱靖長官宋元祐中劉几遇于嵩山眼光如炬

劉伶宰相瞻之兄好仙術有道士至其門曰能相師乎曰  
諾乃隨入羅浮山後四十年瞻被逐至潮臺泊舟有少  
年冒雨而來乃瞻也云已列仙矣悲喜不勝一夕不見

馬大仙青田縣馬氏女唐光化間既嫁家貧養姑尤謹遇  
異人授以仙術往來傭織去家百里食以羹不食即以  
箸筮而還家薦于姑頃之復還人始知其不凡呼為馬  
大仙青田縣有廟

徐道士唐末居青溪縣天樂觀年八十餘夢大羅天賜詩  
因白衆尸解去

閻丘方遠其先齊人幼辯慧學于廬山道士陳玄悟又傳  
法錄于天台葉藏質尤好儒學詮太平經為十三篇唐  
昭宗累召不起景福中始居餘杭大滌洞吳越王錢氏  
厚加禮遇奏請賜紫又奏號洞玄先生重建太極宮居  
之一曰八齊中作空鶴坐怡然而逝有異香滿室後有

見于仙都山者

藍采和不知何所人唐末嘗衣破藍衫六鈐黑木腰帶闊  
三寸餘一脚着靴一脚跣足夏則衫內加絮冬則雪中  
氣出如蒸每行歌城市乞索持大拍板長三尺餘老少  
皆隨看之歌曰踏踏歌藍采和人生能幾何紅顏三春  
樹流年一擲梭古人混混去不返今人紛紛來更多朝  
騎龍鳳遊碧落暮看桑田生白波長景疑輝在烟際金  
銀宮闕高在峩歌辭多率爾而作皆神仙意人莫之測  
但以錢與之繩穿施行失亦不顧或見貧人即與之人  
有自幼至老見之顏色如故後踏歌濠梁于酒樓上乘  
醉有雲鶴笙簫聲忽然輕舉于雲中擲下鞞衫腰帶拍

板冉冉而去其襍衫等旋亦亡矣

石坦勃海人遊起魏諸名山遇異人得道能分身同時詣十餘家已而各家皆云坦于某時到所言各異後不知所往

聶師道歙縣人少學道得服松脂法乃登績溪百杖山採之後詣南嶽招仙觀聞蔡真人舊隱去洞靈源不遠乃辟穀七日獨往遇老父問所從來因折草與之師道咀之味甘自是精健每入山虎豹見之皆馴伏先生一日謂其徒曰我為仙官所召語訖而逝及殮棺有聲視之若蟬蛻然後有自豫章來者見之于道今歙縣有興道院遺跡

崔自然巢縣人少好道服松脂後隱于城南洞中辟穀修煉冬雪大寒澡浴溪中每人山虎豹馴服一日語其徒以仙官來召遂逝有人亦見於豫章道今石床藥鼎見存其所寓謂之崔仙洞

驪山老母唐李筌號達觀子居少室山好神仙之道至嵩山虎口巖得黃帝陰符經其本爛敗筌抄讀數十通竟不曉其義因入秦至驪山下逢一老母弊衣扶杖神狀甚異路旁見一火燒樹因自語曰火生于水禍發必尅筌驚問曰此陰符經語老母何從言之老母曰吾受此符已三元六周甲子矣筌拜母且告所得姥曰少年顧骨貴于生門命門齊于日角德賢而好法神勇而樂智

真吾弟子也乃共坐石上說陰符之義日已晡曰吾有  
麥飯相與爲食袖中出一瓢令筌取水瓢沉乃還已失  
毋所在但留麥飯于石筌食之自此絕粒開元中爲江  
陵節度使副御史中丞爲李林甫所排入名山訪道不  
知所終

徐灣海鹽人少有道術能收捕邪精錢塘杜氏子患邪灣  
爲作法符召之見白衣人入門灣一叱即成白龜後登  
石崎不返兄弟往尋之見灣在山上不動遂抱下惟空  
殼耳蓋尸解也

羊愔不知何所人以明經授括蒼尉隱于括蒼山一日與  
青蓮觀道士飲于阮客洞酒中忽仆地七日乃悟云初

見一人自云雲英邀入洞中石間有物迸出曰此青靈芝也食之得仙惜取食之自是惟飲水覺身輕日行數百里後入委羽山人不之見

章思廉遂昌人居壽光宮為道士誦度人經有悟遂默不語或絕粒不食踰四十年預言休咎多驗

范子珉慶州道士嗜酒落魄談人意外事多奇中善畫牛往訪郡守錢竿曰負公畫四軸故來相償畫成即述將殮得片紙于席間書曰庚申日天帝召范子珉蓋其亡日也

嚴青會稽人嘗于山中作炭忽神人授書一卷曰汝滑可長生并教服石髓法青受之即見左右常有數十人侍

之嘗夜行都巡呵問何人青亦呵問都巡叱從兵收之  
青亦叱從神錄之青徑去而都巡等人馬不能動明日  
鄉人曰必嚴公也報其家往謝青乃放去青後辟穀一  
年仙去

巢道人上猶人幼遇異人授以辟穀法常經月不食自言  
年九十顏如童子日行三百里盛暑烈日不畏避忽一  
日謂所親曰予明日歸去果端坐而逝里人異之以為  
脫穀云

王筵鄱陽人得仙術能治病不用符水針藥但以八尺布  
屨覆之病愈若有邪魅即畫地作獄叩石呼之皆入其  
中有一弟子負竹篋隨行嘗冒風雨衣皆不濕一日兩

炬道入石室中有二人曰卿何為久住俗間荅曰當來乃還家自負竹篋去

饒廷直南城人唐時第進士嘗過武昌遊黃鶴樓忽遇異人授以秘訣自是不適妻妾翛然端居後為鄧州通判卒其柩還鄉甚輕蓋尸解去

應夷節汝南人生不喜茹葷性敏慧長遊天台龍虎山汝南亦有師馮惟良得上清大法樓真天台道元院日誦黃庭大洞二經為人祈福數致感應忽一日沐浴入靜凝神翼日解化是夕清香馥郁猿鳥悲鳴及就窆但空棺而已

朱桃權初成都畫師姓許善傳神有人敝衣憔悴求傳神

許笑之其人以手摩面則童顏矣引其鬚應手而黑乃一美丈夫也許驚曰不知神仙臨降道人曰君傳吾神置肆中有求售止取十千後有識者曰此神仙朱桃權也求者輻輳

緱仙姑長沙人入衡山修道年八十餘孑然無侶居傍南岳魏夫人仙壇忽一青鳥飛來自言我南岳夫人使也以姑修道精苦命我為侶每有人遊山青鳥必預言其姓名一夕曰今夕有暴客至姑無怖果有群僧持火挺刃將害姑姑在床僧不見而去俱為虎所殺姑徙居湖南鳥亦隨之後隱九疑莫知所終

湘中老人不知姓名呂雲卿嘗遇于君山側索酒數行老

人歌曰湘中老人讀黃老手授紫橐坐碧草春至不知  
湖水深日暮忘却巴陵道宋蘇軾謂此詩殆李謫仙輩  
老人直遁世者也今考唐詩此篇乃高駢所作未詳何  
據

賣薑粉不詳其姓名在衡州市中賣薑三十餘年顏貌不  
改嘗遇道人于茶肆謂曰吾有黃白之術求有常德者  
授之翁未應但就擔頭取薑一塊納口中少頃吐出則  
成黃金道士相顧驚笑自是皆不復見

張遠霄眉山入一日見老人持竹弓一鐵彈三質錢三百  
千張無靳色老人曰吾彈能辟疫病當寶而用之再見  
老人遂授以度世法熟視見其目中各有兩瞳子越數

十年遠霄往白鶴山垂釣西湖峯上有石像一老人曰  
此乃四目老翁君之師也不記竹弓鐵彈時耶張大悟  
眉山有遠霄宅址李石詩曰野草閑花不計年亭亭雙  
檜欲參天讀書却得騎鯨老賣藥來尋跨鶴仙

晏仙人樵采汀州山間見一道人食桃餘半顆飼之晏受  
而食忽能前知人禍福鄉人目曰晏仙人

### 後五代

鄭全福浮梁人梁開平中遊獵深入窮谷暮有老人道遊  
新安靈巖諸洞及出有鹿引上山半坡遂結茅修煉後  
年百餘歲語門人曰必葬我浮梁白水鄉及卒弟子昇  
至夕陽嶺上覺棺空發之惟履杖而已一云唐文宗時

入靈巖洞修煉後居蓮花洞遊桃花溪有老人乘鐵船  
全幅曰願借船還人間老人曰後三年復來時年百餘  
歲語門人蔡浮染焚後惟存杖屨時有鄭思遠號丹陽  
真人得真仙源派

任生不知何所人後唐同光中乘鳳號為野人後于王子  
潭躍身騰空冉冉而去

鶴衣道人不知姓名錢氏王吳越時日醉處州龍泉縣鳳  
凰山下為里婦所辱嘆衣為鶴乘之而去後人因建祠  
即今報恩光孝宮是也

錢朗南昌人讀書西山以五經登科仕唐累官至光祿卿  
文宗朝歸隱廬山得補腦還化之術錢鏐延至于杭禮

之如師玄孫數人皆以明經為縣宰已皓首矣而朗猶如童子一日語家人曰我適為上清所召今去矣俄氣絕數日顏色如生舉棺戶已解去時年一百七十餘歲曾文迪雲都人天文識緯黃庭內景之書靡所不究而地理尤精梁貞明間遊至袁州府萬載縣愛其縣北西山之丘謂其徒曰死葬我于此及卒遂葬其地後其徒在豫章忽見之駭而歸啟其墳無有也

方字養素號長笑先生居南嶽山得道成仙

劉海蟾初名操改名玄英廣陵人第明經仕燕劉守光為相素喜黃老教忽遇正陽子為演清靜無為之宗金液還丹之要遂辭燕適秦韜光隱晦嘗道遇尚書郎李觀

語曰奉煩寄語養素先生藍方十月懷胎如何得出觀  
至南嶽語方方驚曰吾養聖胎已成念非海蟾不足以  
成吾道是年方卒嘗訪陳希夷為方外交所至多有遺  
跡後白氣自頂門出化鶴飛升元至元六年封明悟弘  
道真君

楊仙公淄齊間道士莫知其年壽耆老自童稚見之或就  
鐵鋪借鐵椎自擊其頂或令人極力擊之無所損入山  
與虎豹為戲以手擊之猛獸偃仆後唐長興中入蜀自  
云居峨嵋山

張薦明燕人少為儒遊學河朔漁獵莊老其後雲衣星冠  
奉自然之教晉高祖召問道可以治世乎對曰得道之

極者尸居衽席之間可以治天地奚止于世也帝遂延  
入內殿令講老子道德經馮道等執卷而聽帝益加尊  
重禮之為師嘗聞宮中鼓音謂鼓以守一和五音人能  
混成于心則天地俱矣何患世之不淳帝由是致心虛  
靜

譚紫霄泉州人有道術事閩主昶封正一先生閩亡寓廬  
山棲隱洞其徒百餘皆能禁沮鬼魅禳祈災福南唐後  
主召紫霄至建康賜以道號階以紫金皆不受武昌軍  
節度使何敬洙置婢井中死人無知者敬洙遘疾召紫  
霄中夜燃燈披髮靜坐見女厲自訴為祟之由敬洙曰  
信然乃書符送之疾即愈有僧于溪許剏亭苦大石橫

直紫霄以手捻訣以水噀之命提其石應手如粉後無  
疾卒人謂之尸解歸葬之日有祥雲白鶴盤遶送之

王帽仙蜀人出入闐闐為人修獎冠號王帽子暮則卧于  
涪州天慶觀一夕尸解道士葬之月餘自果山貽書致  
謝

韋昉蜀人夜泊涪陵江忽遇龍女遣騎迎入宮後昉登第  
十年知簡州龍女復遣書相迎卒勅命昉充北海水仙  
譚峭字景升唐國子司業洙之子洙訓以進士業而峭深  
好黃老書師嵩山道士十餘年得辟穀養氣之術父寄  
以衣即與貧寒者後煉丹南嶽成能出入水火亦能隱  
化入青城山仙去峭嘗作化書宋齊丘竊其名行于世

耿先生女冠也不知何所人鳥爪玉貌宛然神仙南唐保  
大中遊金陵元宗召入卧内先是大食國進龍腦油二  
器元宗秘惜先生曰此非佳者當為陛下致之乃以絹  
囊懸龍腦于屋棟瀝液如注味逾所進嘗擲雪為鏤成  
金又取宮人箕中糞糞燒為白銀又以小麥陶洗炒銀  
釜中勻食皆成美珠未幾有孕將誕曰我子非常產夕  
當有異倏忽雷電繞室大兩傾注詰旦空腹人莫見其  
所產元宗殂不復入宮莫知所終

蕭行美沔陽人年九十餘篤行履素嘗遊對融山遇一老  
人自稱張先生指草一叢曰移歸栽之可煮鐵成金戒  
之曰切不可泄行美受教遂移草歸試之果如其言又

續文獻通考卷之二百四十二終  
之泄其事一夕大風雨漂失其車再入山訪之不復有  
矣

續文獻通考卷之二百四十二終

續文獻通考卷之二百四十三

皇明進士雲間王圻纂輯

仙釋考 道家姓氏下

宋

陳搏亳州真源人四歲時有青衣姬乳之自是聰悟過人及長經史一覽無遺曰吾將與安期輩論出世法乃盡棄家業携一石鐺而去遇孫君方謂武當九室巖可居逐棲武當服氣辟穀二十餘年忽夜見金人持劍呼曰子道成矣當有歸成之地又五龍化爲老人曰華山乃先生棲真之地因徙居華山常閉戶卧累月不起唐明宗召見賜以二宮女却之上詩曰雪爲肌體玉爲腮多

謝君王送到來處士不成巫峽夢空教雲雨下陽臺周  
世宗賜號白雲先生宋太宗賜號希夷先生後復召辭  
曰一片野心已被白雲管住九重丹詔休教彩鳳啣來  
又作睡詞曰臣愛睡臣愛睡不鋪穗不蓋被片石枕頭  
簑衣鋪地震雷掣電鬼神驚臣當其時正鼾睡閑思張  
良夢想范蠡說恁孟德休言劉備三四君子只是爭些  
閒氣爭如臣向青山頂上白雲堆裏展開眉頭解放肚  
皮且一覺睡管甚麼玉兔東升金烏西墜端拱中命弟  
子於蓮花峯下鑿石室子張超谷中而化

蘇澄隱真定人爲道士住龍興觀得養生術年八十餘不  
衰老五代唐晉繼有聘皆辭疾不至宋太祖征太原還

駐青陽召見因問其術對曰臣之養生不過精思煉氣  
帝王養生異於是老子曰我無爲而民自化我無欲而  
民自正昔黃帝唐堯享國永年得此道也上大悅年幾  
百歲卒

趙自然繁昌人家以鬻茗爲業年十三疾甚父抱詣青葉  
觀許爲道士後夢一人姓陰引之登山啖以栢枝及覺  
遂不食神氣精爽宋太宗兩召至闕賜衣服銀幣遣住

青華觀以母老求歸侍養

銅陵縣志云趙自然居銅陵縣陶村嗜種杏煉丹太平興

國中一夕夢真君授以篆遂能篆又夢與栢枝遂不食雍熙中召至闕下賜觀於繁山縣之鳳凰山

丁少微亳州真源人爲道士隱華山潼谷密邇陳搏所居  
志尚清潔善服氣多餌藥百餘歲康健無疾太宗召赴

關以金丹巨勝南芝爲獻留教日遣還山卒

崇通玄陝州閿鄉人爲道士於承天觀年百餘歲善辟穀長嘯惟飲酒言唐末事歷歷可聽太宗召見懇求歸真宗祀汾陰亦召對明年春通玄作遺表遣弟子詣關又召官僚士庶言生死之要夜分盥濯燃香遲明卒

鄭榮本禁軍戍壁州還夜遇神人謂曰汝有道氣勿火食因授醫術救人大中祥符七年賜名自請度爲道士居上清宮所傳藥能愈大瘋民多求之皆刺臂血和餅以給焉

景知常鄧州人少從趙穆學道頗如丹渥太宗嘗召見俄辭去遇呂真人時或語唐昭宗以來事殆數百歲或

初寒浴溪或大暑偃地有書生病憊嘔酒飲之即愈所  
居夜神光滿室卒寒其棺甚輕開視惟衣衾有異香焉  
劉氏女高化劉安上女雍熙初九齡與羽人談道得度及  
筭許妻何氏子劉氏送之忽有一白鷺自空而墮劉女  
乘之去陳軒詩曰白鷺乘去人何在青鳥飛來信已遙  
若使何郎有仙骨也須同引鳳凰簫

劉希岳漳州人端拱中爲道士居西都老子觀中遇異人  
得道號明然子嘗自言辛勤未踰十年人驚不老歲月  
俄經一紀自覺如新又詩云夾春雙闕至頂門修行徑  
路此爲根一日沐浴更衣陳席而卧須臾飛出一金蟬  
遂失所在

抱一道士姓趙梁泉人嘗遇一老人篋中取物餌之狀如  
蘆菰又與之小瓢中有藥如菰豆戒曰遇有疾施之自  
是絕粒真宗東封賜此號 一云趙抱一嘗牧羊田間  
一夕有叩門召之者以行杖引杖端有氣如烟其香可  
悅俄至山巔見數人會飲音樂交奏抱一駭而不測會  
巡檢司過聞樂聲疑群盜驩聚集民梯崖而上至則無  
所覩惟抱一獨在援以下之具言其故自是不喜熟食  
面如嬰兒大中祥符四年詔賜名度爲道士

馬自然其先鹽官人世爲小吏自然獨好經史工文學習  
修真煉氣之方遇劉海蟾授以金丹秘術嘗徧遊方外  
至湖州醉墮雪川經日而出衣不沾濡指溪水能令逆

流大中祥符間卒葬於其家東園明年東川奏梓  
有道士馬自然自日上昇杭州發其塚止存竹杖

張無夢未嘉開元觀道士真宗召對講易謙卦上問曰獨  
說謙卦何也對曰當大有之時守之以謙復命講還元  
篇數對詳明真宗大悅宸翰特賜以詩寵其還山

賀元瑯瑯人得道不死真宗東封謁於道左曰晉水部員  
外郎賀元再拜而去蘇軾詩曰舊聞父老晉郎官已作  
飛騰變化看聞道東家君處願供菽水看燒丹

郭上竈天禧中以儒淪湯滌器汴州橋茶肆中一日遇呂  
嵩隨去十餘年始歸語趙長官曰大數垂盡願施一小  
棺乞於棺首施一穴挿通節竹於穴中以通氣明日汲

水浴身卧視下遂絕葬於河岸是秋水漲趙往視獲棺  
無尸

甄棲真字道淵單父人幼舉進士不第遂入建隆觀爲道  
士年七十五遇許元陽許可學仙因授煉形養元之訣  
漸返童顏步輕若飛後尸解去棲真自號神光子與隱  
人海蟾子以詩往還論養生秘術目曰還金篇凡兩卷  
石仲元桂人號桂華子爲道士於七星山於詩妙究精微  
天禧中將殆謂門人曰榮謝當然未喪之文子其嗣之  
盡出平生所作三百餘篇授之曰凡我所得子之所知  
必傳之門人因持爲桂華集

王鼎襄陽人初守益州中中以養妻子後遇鍾離先生遂

得仙術自號王風子人不見其飲食也一日行江干人見其水中有二影怪問其故曰若欲更見之乎須更見十影衆皆驚真宗召至禁中長揖不拜後辭去不知所之

賀蘭號棲真自言百歲善服氣徃徃不食或時縱酒能啖肉至數斤始居嵩山紫虛觀後徙濟源奉仙觀真宗召至問曰人言先生能點化黃金信乎對曰臣願陛下以堯舜之道點化天下方士僞術不足爲陛下道真宗許其言賜號宗玄太師賚以紫服白金仍蠲觀之田賦未幾求還舊居卒時大雪三日頃猶溫人皆異之

神和子姓屈穴名無爲張詠嘗遊京師於封丘門逆旅遇

一道士與飲至醉詠曰不知姓名異曰何以相識道士曰我神和子也異日見子於成都耳後詠守成都始異其言嘗以物色訪之弗得後於天慶觀院堂壁上畫一道人肖逆旅所見視其題曰神和子詠悵然自失

劉遁不知何所人爲道士丁謂與相往來一日遁作詩贈謂有他時駕鶴遊滄海同看蓬萊島上春之句謂莫晚其意及南遷遁見於崖州方悟其詩意乃知道異人也與之泛舟而飲曰成子詩意

李至能慈谿人住永昌潭上大觀中書符呪水檄召神時輒至一日至能出其徒盜其呪水焚檄爲戲神怒至大於庭無以號令遁云此地卑濕爾爲我移之

風雨發屋拔木運屋溪南高爽之處號曰神運殿治平  
一年賜神運至道額

交趾道士居萬州城南年九十九自言交趾人因渡海船  
壞結廬於此養一鷄大如倒掛子日置枕中啼即驚覺  
又畜一猢猻小如蝦蟆以線繫几案間道士飯已即登  
几食其餘又有龜狀如錢置盒中時使出戲衣褶間僧  
惠洪見之戲曰公小人國中引神通也

鷄窠小兒李貞爲承旨奉使過海至瓊道逢一翁自稱楊  
避舉年八十一其父叔皆年一百二十餘又見其祖宋  
鄉年一百九十五次見鷄窠一小兒出頭下視宋卿曰  
此九代祖也不語不食不知其年數

張九哥慶曆中居京師雖盛冬單衣燕王哥之嘗召見與之酒歲餘見王曰將遠遊故來別有小技欲以悅王乃取羅重疊爲蝴蝶狀隨剪皆飛去莫知其數少頃呼之蝴蝶皆來復爲羅王曰吾壽幾何九哥曰與開寶寺浮屠齊堅後浮屠災而王薨

侯先生不知何許人慶曆間貨藥京師年四十餘無鬚眉瘤贅隱隱徧肌體嘗半醉遇夜與丐者同處有馬元者盛夏隨之出閭闔門浴池中元因就視乃一蝦蟆元遽引退侯浴出著衣元前揖之笑曰子適見我乎乃召元飲酒肆中出藥一粒曰服之令子壽百歲自此不復見有自蜀中來者見其賣藥於市

武志士修煉於來賓之武禪山每前赴齋供即架青布幕  
爲橋去五六里遠至市廛人見而奇之越數年道成皇  
祐中白日上昇

曾至靜廬陵人自少不御酒肉端毅寡言去爲道士益玄  
默忽遇異人授以秘術自是杜門辟穀十餘年異人來  
視之曰未也又數日復至曰可矣至和二年春忽告其  
徒曰吾九月爲衡山遊至期正坐而化旣葬有自衡山  
來者持至靜書勉其徒學道云

徐問真維州人有道術與歐陽修善一日求去甚力修留  
之不可曰我友罪我與公知遊修使人送之果有鐵冠  
丈夫長八尺餘俟於道周以瓢覆酒於掌中以飲提筭

童子遣回不知所在嘗教修引氣愈足疾蘇軾試之亦驗

邵琥湘陰縣人少與兄玘弟珪同遊太學遇至人後歸都嶠山草庵修煉元符初蘇軾自嶺南歸訪琥庵中留旬餘琥後立草庵西蜀峨嵋山不知所終留題壁間云往徃来来三十年更無踪跡在西川功成行滿昇天去回首山頭月正圓

徐熙春邵武人熙寧初夢鐵冠道人儀容修整既寤至城南五峯院遇所夢者自言姓蔡住武夷遺以五華草食之甘美自此不復粒食惟飲清泉約以某日會武夷至期而徃蔡已先至徠以水深不能渡止於金身院修煉

尸解而去

陳太初眉山人初與東坡同學於道士張易簡後東坡謫居黃州有眉山道士陸惟忠來曰有得道者曰陳太初問之則同學者也又數年見於惠州云太初已尸解

陳易興化人好學攻詩熙寧中遊京師王安石邀至相府易一見不辭而歸不葷不娶野服葛巾月十飯或累旬不食居蔡溪之左巖中五十年猶一日宣和中踟蹰而逝

黃希且長樂人號支離子居九龍觀脩然有出塵之志熙寧五年作五福宮成希且以戒行清淨召至京師後二年化形於太乙宮後復見於蜀有詩寄友人曰昔遊西

太乙今日返成都若問去來事雲藏月影孤

張道潛郢州人熙寧中入九宮山修道後光宗嘗有疾召入以符水治之即愈修醮之夕光景如畫因賜號真君  
寧宗親書欽天瑞慶宮五字賜之時年已一百三十餘歲矣

曹國舅曹太后之弟隱跡山岩精思慕道得遇鍾離純陽純陽問曰聞子修養所養何物對曰養道曰道安在舅指天曰天安在舅指心鍾離笑曰心即天天即道却識本來面目矣遂引入仙班

朱有涇州人少竄名五符元豐初瀘賊犯塞詔起秦卒不之軍次資中郡有醮壇山李阿試仙臺有往來臺上俄

二鳥飛鳴爭食墜地若松枝者有取食之即臍脹且渴求水飲焉遇一道士指松曰食此葉可療也忽不見有如其言渴遂止自覺心爽神清有始不知書不飲酒至是高吟劇飲脫五符而神去

張用成本名伯端字平叔號紫陽台州人嘗入成都遇劉海蟾得金丹術歸以所得著悟真篇八十一首授扶風馬默曰平生所學盡在是矣嘗與一僧神遊揚州觀瓊花紫陽手中拈出而僧無有也元豐中年九十九跌坐而化有尸解頌曰四大欲散浮雲已空一靈妙有法界圓通弟子焚其尸有舍利後七年劉奉真過於王屋山趙吉高安人狂而落魄兩目皆翳自言生一百二十七年

矣元豐中蘇轍謫居高安徃見曰吾知君好道而不得  
要陽不降陰不升故肉多而浮面赤而瘡教轍挽水以  
灌百體經旬諸疾皆愈後尸解於興國軍

陳仁嶠南海人嘗夢爲逍遙遊及寤思舊遊不可得忽一  
日有仙數百從空招之仁嶠超然隨衆朝謁於帝遂掌  
蓬萊紫虛洞元祐中降於廣州進士黃佑家者再

周史卿浦城人元佑中遇異人得養生之要隱油果山二  
十年煉丹垂成一夕風雷大作丹已失矣遂出神求之  
謂妻曰七日來復有一僧勸其妻曰學道者視形骸如  
糞土遂焚之明日史卿來空中啞啞責其妻而去

雷隱翁名本少落拓不群既長業進士再試即棄去默坐

終日人或笑其癡隱翁曰終不以吾癡易汝默一日以術授其子出遊不返元祐間有朝士遊羅浮山見其坐於松下自道姓名曰雷隱翁

陶道人黎州卒紹聖間入獅子山採薪遇異人得道與王盡龍同時所盡龍有神異必有所闕不然則隨雷雨變化每見王則以杖擊之曰此龍妖也後俱不知所終

劉混康晉陵人幼遇異人授以呪術治疾輒愈徽宗聞而召之入對稱旨後住茅山賜號葆真冲和先生

薛道光一名式一名道源峽府鷄足山人嘗爲僧法號紫賢一號毗陵禪師紹興中尸解壽一百十四歲

陳楠字南木號翠虛惠州博羅縣白水巖人以盤櫬籊楠

續文獻通考卷之二百四十三

十

四百五

爲業後得太乙金丹訣於毗陵禪師得景霄大雷瑯書於黎姥山神人遂能捨土愈人病人號陳泥丸政和中擢道院錄事後歸羅浮驅孤治病鞭龍救旱浮笠濟湍流含水銀成白金顯諸神異

張虛白南陽人通太乙六壬術留心丹竈遇真人得秘訣徽宗聞其名召管太乙宮恩賚無虛曰官太虛大夫金門羽客出入禁中終日論道無一言及時事曰朝廷事在宰相非予所知金人尤重之以爲神仙忽一日曰某年月日吾當化去至期果然

張仙姑南陽人莫詳其所以人有疾仙姑輒瞑目潛爲布氣攻之俄覺腹熱如火已而鳴聲如雷雖沉痾者無不

愈徽宗嘗召至中都後不知所終

魚肉道人成都人生於大觀中手足孿縮瘡不能言遇異人以藥一粒納口中遂能言語動作知隱隱事遇武當孫坦先生曰羅浮山王野人五代時惠州刺史棄官學道宜往拜之道人登羅浮綠藤上崖見野人踞坐拜而拱立野人曰子可教取魚肉與之道人自此能食生肉紹興末封遶真先生

張先生池州人少遇異人得道結廬齊山中常默不語士大夫問之直視不對終日端坐廬中三十年神彩超然毛髮玄潤肌理如玉雪政和中尸解

羅昇宜春人少貧業屠狗晚乃貨藥市中遇異人授以方

衍年幾百忽一日辭親戚奄然逝時政和二年也

李思廣吉水人自幼志操特異放情山水間得錢即易酒或獨飲於市年踰七十容貌愈少政和四年遊螺川常住習溪橋酒家老嫗以爲異來則飲以酒不問其直一日謝別老嫗晨起視已死矣遽報所親殮葬之月餘有見思廣於千里之外衣冠如故乃開館不見其尸

劉野夫青州人居東都嘗約龔德莊曰君家人夕必出我往見君至晚德莊坐待不出俄火自門起德莊犯烈焰而出四傍皆燼翌日野夫至曰君家人幸出可賀也陳了翁深重之政和間寓興國寺計其壽一百四十有五歲

林靈素永嘉人以方術得幸徽宗賜號金門羽客一日侍宴太清樓下見元祐黨碑靈素稽首上恠問之對曰碑上姓名皆天上星宿臣敢不稽首因爲詩曰蘇黃不作文章客童蔡翻爲社稷臣三十年来無定論不知奸黨是何人

王老志濮州臨泉人嘗遇鍾離於丐中與之丹服之而狂遂棄妻子結草廬田間時爲人言休咎政和三年召至京嘗緘書至帝所啓之乃前中秋節與喬劉二妃燕好語也帝封爲洞微先生後歸濮而死

王仔昔洪州人自言遇許遜得大洞隱書豁落七元之法徽宗召賜冲隱處士以療官妃目疾進封通妙先生後

坐言語不遜下獄死

魏二翁濮州雷澤人遇異人得道手持蒲筴時時語人禍福里閭重之或製續奉以禦寒盜夕至欲竊之二翁呼其名曰爾欲我續乎盜驚謝而去徽宗聞其名遣使起之至廬但聞鼻息齁齁如雷不見形影得頌一章以獻宣和初尸解

羅晏閬州人兒時牧山下見二道人奕奕舍牧觀之道士出囊中餅與之食晏歸家覺腹中如燎因發狂累日自是惟飲水數日不一食稍稍預言禍福皆驗宣和中賜號靜應處士張浚延至軍中晏曰相公忽恐明日慮退男加號太和冲夷先生蜀人相傳壽至一百七十八

云

孫賣魚不知其名嘗賣魚楚州市極暑中遇一道士謂曰  
汝魚餒矣能飲我可使魚活遂飲以斗酒魚皆活因與  
談論自是孫言人禍福輒應宣和中召至京師賜號塵  
隱處士復還楚州靖康初嘗於亳州太清宮號咷大哭  
而去人莫之喻有記其時月乃汴京陷時也後不知所  
終

張繼先字嘉聞號翛然子三十代天師五歲不言一日聞  
鷄鳴忽有所咏九歲嗣教崇寧中召至闕問曰汝居龍  
虎曾見龍虎否對曰虎則常見龍類今始覩之生悅後  
泊解池水溢鹽課復故封爲崇寧真君又建醮內庭客

奏赤馬紅羊之兆請修德以禳之賜號靜虛先生金師  
犯汴二帝召之至泗州天慶觀作頌曰西山下紅日煙  
雨落潛潛書終而化汴京亦以是陷後人有遇於武夷  
及羅浮西蜀者

白雲片鶴金明縣人爲道士自稱白雲片鶴宣和初遊汴  
見趙鼎大呼曰中興名相也人驚異之他日又遇鼎曰  
吉陽相逢後鼎紹興五年爲相有重名晚寢吉陽忽與  
白雲相見白雲曰憶疇昔之言乎公將歸矣未幾鼎卒  
王文卿臨川人解呼雷致雨役使鬼神之術宣和初召見  
時將有事明堂雨不止上命禱晴天忽聞雷又楊州大  
旱詔求雨乃伏劔嚙水曰借黃河水三斗數日揚州奏

得雨皆黃泥詔封冲虛通妙先生後歸老紹興一日謂其徒曰西北有黑雲起當速報我移時果然即入空解化軀道初人有見於成都者

維道人不知何許人嘗遊峽西遇異人得秘訣預知休咎劉延慶故重之靖康二年春忽大哭於市別鄰里去及汴梁陷二帝北狩乃哭之日也

顧筆僊高郵人建炎初鬻筆過仙口售筆十則止人置錢於筒筆自躍出會轉運使過境見之問曰能飲否曰可飲一斗飲畢長揖而去遺所携筆籃於舟中轉運使左右取而還之盡力不能舉凡得其筆者剖而視之中必有詩或偈記其破毀歲月及人姓名禍福無不驗者年

九十七一日積薪庭中坐其上自舉火焚之但見烈焰  
中乘火雲飛昇而去

謝賢四明烏巖材人父宗立母董氏禱於真武夢雷震而  
乳生時有金光燭室年數歲夢真武爲浣腸溪上水至  
今有赤色天旱與群兒束芻龍祈雨雨即至芻龍放溪  
上觸石而沒成深潭大旱使祈雨密呪母擊鑊箕旋以  
紡車洒水母如其言而忘洒水遂有雷無雨因如呪爲  
之雨遂沾足建炎三年三月召鄉里故舊曰吾明日還  
造化三年後當復生幸勿葬我次日午果卒越三年忽  
聞棺中有聲啓視之容貌如生火從頂出化焉

朱棣字彥誠鄧人嘗出遊得石室書讀之遂通道家法能

役使鬼神

琮師廣東人隱湖光巖超然拔俗足跡不至城闕李綱至即出謁官僚欲見之即飄然而去後跌化

牟羅漢眉人名安以願兵隸卒願如岷山陟上清阪忽遇髯者顧笑曰汝饑何不食栢子乃摘干投其口顧髯者不見矣遂不火食大雪庭有大甕貯水解衣就浴往往通老莊至到語一日江水暴漲舟不可行或戲指其笠曰乘此渡可乎遂置笠水面趺坐其上截江以濟觀者異之人呼爲牟羅漢

馮觀國邵武人遊方外遇異人得肉丹之法自稱無町畦道人寓宜春二年言人吉凶甚驗或有謂其醉狂者觀

國以詩謝之曰踏遍紅塵四百州幾多風月是良儔朝  
來應笑酡顏叟道不相侔風馬牛紹興中端坐而逝鄉  
守李觀民爲塑其像於治平觀

宋耕號雪溪先生家世雙流遷崇慶紹興中爲閬中令以  
儒去後其孫德之聞其在四明親往訪焉至雪竇山有  
蜀僧言聞諸耆老云山後有爛平山有二居士焉其一  
宋宣教也德之躋攀至爛平果見丹竈而仙跡不可復  
尋矣乃置祠其上而歸

莎衣道人淮陽軍胸山人姓何避亂渡江紹興末始來平  
江倏若狂者晝馬食於市夜止天慶觀木弊以莎緝之  
嘗遊妙巖寺臨池見影豁然大悟人無貴賤問以休咎

無不奇中有瘞者乞醫命持一草去旬日而愈求而不得者或遂不起遠近異之孝宗召之不見賜號通神先生賜衣數襲皆不受

李鼻涕紹興初劉延仲寓秀州常有道人過門或從求藥則以鼻涕和泥賦爲丸與之因目爲李鼻涕延仲與坐曰今日適無酒爲禮道人笑曰床頭珍珠泉一尊何不出以待客劉大笑呼童取尊道人曰不必取但將一空瓶來瓶至索紙覆之少焉香溢於外成美酒矣坐者皆醉明日劉有他客出所謂珍珠泉者飲之而中空無涓滴一日詣劉別曰後二十年某月日當於真州會至期劉卒於真州

武元照蕭山人方在女孩母或茹葷即終日不孔及菜食  
乃乳母異之後長議適人女不樂忽夢神人告曰汝本  
王女坐累暫謫人世可絕食及覺欲不食母強食之又  
夢神怒曰違我戒剖腹脍之因授靈寶法自是以符水  
療人疾一日詣數十家聚話後往其家訪之云已死矣  
驗其詣之日即其尸解之日

李氏子平陽獨嶼人紹興末以跌蕩不容於父遇一方士  
將以東遊不移時達樂清孝義橋下去家已三百餘里  
矣辭不能進方士出一小鏡使窺之恍然抵一山寺俄  
而如夢覺視其僧舍則已在靈巖寺矣

天童寺僧嘗至雁山中偶失道循小徑至一處有茅屋數

十家皆方士也笑謂僧曰爾亦知雁蕩乎方冬沍寒而其地爰桃有實僧摘數枚懷之方士呼童子奪取其桃僧因恍忽過山椒不覺至明州天童寺矣

石泰常州人字猗之號杏林一號翠玄子初張紫陽得道於劉海蟾海蟾以他日有爲汝脫繮解鎖者以此道授之紫陽三傳非人皆遇害誓不敢妄傳後坐事黥竄經由邠土而杏林適遇於酒肆紫陽乃以丹法傳杏林杏林苦志修煉壽一百三十七紹興二十八年尸解後二年易介復見杏林於羅浮山

皇甫坦蜀之夾江人嘗愈顯仁太后目疾高宗召見問何以修身曰心無爲則身安人主無爲則天下治復問長

生久視之術曰先禁諸欲勿令放逸丹經萬卷不如守一帝美書清靜二字以名其庵具繪其像禁中高宗孝宗皆稱皇甫先生而不名又相李道中女必母天下後果爲光宗后

唐廣真嚴州人旣嫁得血疾夢道人與藥服而愈自是與夫相離從師修道經謁何仙姑淳熙中在郭家食飯次若有人喚者出門逢三仙人引至海邊跨大蝦蟆渡海因隨遊名山仙人曰汝欲超凡入聖耶若形在世耶棄骨成仙耶對曰有母尚在願終奉養曰如是則留形在世遂與丹一粒吞之自是不食米後召入德壽宮封寂靜凝神真人

李仙融州人名賤子傭於柳城縣龍氏爲耕牧性喜眠龍氏常責之賤子乃束草爲人驅使耕耘龍氏驚遣之歸賤子驅逐邪魅不暇符咒嘉泰中化去

白玉蟾名葛長庚母以夢呼玉蟾瓊州人年十二舉童子科於黎母山中遇異人授洞玄雷法後居武夷山嘗自贊曰千古蓬頭跣足一年服氣餐霞笑指武夷山下白雲深處吾家嘉定中詔徵赴闕對御稱旨命館太乙宮一日不知所在後徃來名山入水不濡逢兵不害神異莫測詔封紫清明道真人有上清武夷二集行世玉蟾自號海瓊子或號海南翁或號瓊山道人或號蟾庵或號武夷散人或號神霄散吏人云尸解於海豐縣

彭耜字季益三山人事白玉蟾得太乙刀圭火符之傳九  
鼎金鉛砂汞之書紫霄嘯風霆之文遂杜門絕交遊  
亦不理家人產業妻潘蕊珠與同志晨夕惟薰修而已  
其沉酣道法呼嘯風雷人所敬慕後尸解於福州今城  
東有鳳丘山鶴林院存焉

朱橘號翠陽居淮西安慶之望江母嚴氏夢吞大星而娠  
既十五月遇道人持物如橘謂曰食此子生矣母問其  
名氏示以扇有鞠君子三字移時而誕因以橘名既長  
而臨池顧影恍然有悟遂厭薄名利遊覽名山後遇鞠  
君子授以長生之術令往皖公山修煉而茹葷食肉不  
異於俗後之羅博留三載始坐化而復生後乃立化有

狼更執斧斲之惟見堆泥墮地而已乃知橘神變尸解也時淳祐二年十一月十三日

楊權肝江人自少頽悟不群聞張真牧有道行即往從之真牧授以九還之術曰逢江莫行至沱則止後舟次九江沱嘴因結茅修煉其中時大疫施以符水輒效遠近慕之咸淳中封通慧辛惠真人

保定老姑不知名字嘗謂人曰貧道持世二百年矣言畢投崖下不墮飛昇而去後人名其崖曰捨身崖又曰老姑峪在保定府唐縣葛洪山之西南隅

申屠有涯宋時居宜興携一瓷甌一日與衆共渡飲酒大吐衆逐之乃挈甌登岸倚杖吟曰仲尼非不賢爲世所

不容啗啗同舟于下識人中龍吟畢跳身入甌中衆皆駭異碎其龍寂無所見

崔之道舒城人爲真源宮道士嘗見二仙人對奕與一奕子令吞之自此言禍福輒應後尸解

侯谷神沂州道正貌古形癯酷慕神仙黃白之術一日鵝衣道士入觀中少詬問袖出丸藥二粒賜谷神啖之年踰八十有五羽化

孫守榮富陽人遇異人授以鐵笛因號富春子吹笛市中嘗遊吳興聞鼓角聲曰旦夕將有變士人當有典郡者見王元春即曰典郡者公也已而潘丙作亂元春以告變功果典郡自是富春子之名大顯嘗謁史嵩之聞者

以晝寢辭榮曰丞相方釣魚園池何得云寢閣者驚異  
入白丞相丞相一見頗喜後所言多中竟爲嵩之貶死  
遠郡

吳守一蘭陵人早爲黃冠師後從淵然劉真人授以煉度  
秘術入瑯琊神峯山之陽棲霞辟穀忽有道人入庵與  
語須臾出茶一包烹與共啜出戶少頃道士不見年踰  
九十鶴髮童顏羽化之夕奇香滿室白鶴遶空者移日  
云

張拱汴人宋舉進士不第賣藥宜春門忽有道士抵其肆  
授以棗七枚食之不饑踰二年瘦矢俱絕神明氣爽日  
可行數百里後遊名不知所終

黃昇長汀人自幼得道法釵沉水中者呼之即出又能納  
末於口中運氣煉之即成白金有蔡道人死升爲棺殯  
後遺書與升曰在崆山相候升往見之曰吾向時有文  
字在壁隙間汝歸誦之忽不見升得其文字能使鬼  
神後尸解

藍橋龍川人宋時舉進士不第隱於霍山常吹鐵笛賦詩  
曰太乙亭前是我家滿床書史作正涯春深帶雨不歸  
去老却碧桃無限花一日飛昇而去後有人見之於洛  
陽

盧六止木係人生不食肉忽一日往樵大山見二白衣對  
奕六傍立良久曰汝且去明日可再來言訖白衣者不

見六還至家如約而徃至大山之巔有平石方丈乃坐其上而化鄉人以爲仙去建祠祀焉

金

王嘉始名中孚字允卿又易名世雄字德威後入道改名嘉字知明號重陽子咸陽人母感異夢而妊二十四月始生旣長倣儻尚義不拘小節人號爲害風年四十八忽遇異人乃吕仙翁化身也授以修身真口訣大定七年抵寧海立全真觀十年卒享年五十八弟子馬鈺嗣其教與譚處端劉處玄丘處機繼爲宗盟而全真學者稱鍾吕劉爲三祖又以嘉爲祖師元至元六年贈爲重陽全真開元真君

馬鈺初名宜甫寧海人號丹陽子母夢麻姑賜丹一粒而  
生兒時李無夢見而奇之曰額有三山手垂過膝真大  
仙才居崑崙煙霞洞忽患頭痛不可忍師知其破戒以  
法水愈之而戒其斷酒色財氣攀緣愛念憂愁思慮十  
二字後能使枯木重榮禱雨輒應卒之日雷震一聲枕  
弦而逝年六十一次年徐惟祖等見空中鸞鶴交舞丹  
陽見於雲際元至元六年贈丹陽抱一無爲真人有金  
玉集漸悟集行化集成道集團成集精微集及語錄集  
行世

孫仙姑名不二號清淨散人寧海縣忠翊幼女天輔二年  
母夢鶴入懷而娠生而聰慧柔淑父以配馬宜甫生三

子重陽祖師盡骷髏勸化之又盡天堂一軸示之姑拋  
棄三子屏絕萬緣詣金蓮堂祈度時洛陽有風仙姑所  
居列上下二洞孫仙姑往依居下洞六年道成庵化香  
風瑞氣竟日不散時宜甫居寧海仙姑乘彩雲而過告  
曰吾先歸蓬島矣元至元己巳賜號清淨淵真順德真  
人有詩詞行世

譚處端初名玉字伯玉號長春子寧海人八會元年生骨  
相不凡六歲時墮井遇火俱無所傷長感風痺疾暗誦  
北斗經求濟忽夢取得橫空大席諸星君坐其上已拜  
其下自是道心遂決大定中聞重陽祖師在馬丹陽家  
徑往師之冬夜籍以海藻不任其寒祖師展足令抱之

續文獻通考

卷之二百四十三

三

四十四

汗出如置身甌中黎明以盥手餘水滌其面宿疾頓廖  
遂誠心服事得其道後能以陽神遊於外書龜蛇二字  
帖吳六酒肆得免火患人求書者多以二字與之亦以  
示已歸化之期元至元六年贈長春雲水蘊德真人有  
水雲集行世

敕大通字太古寧海人號廣寧子熙宗天眷三年生嘗夢  
神人授以周易秘義由是隱於卜筮中後從重陽祖師  
學道嘗坐於趙州橋下兒輩戲累石爲塔於其頂囑以  
勿壞頭竟不側河冰溢不動亦不傷如是者六年凡所  
言莫不應貴人欲見之卒不可得辛年七十有三元至  
元中贈廣寧通玄太古真人所著有太古集心經救苦

經太易圖及示教真言行世

劉處玄字通妙東來人皇統七年母王氏夢取玉樹金葉而生既長不肯娶大定九年於隣居暗壁間得二頌其末曰武官養性真仙地須作長生不死人是歲重陽祖師東來處玄與母俱往參謁祖師曰汝解壁間語否相視而笑後玄風大振相從者日衆遂註黃庭道德清淨等經能出神外遊預知人禍福元至元六年贈長生輔化明德真人有太虛安閑仙集船陽大成大同神光至真語錄等集及道德註陰符演黃庭述行世

王處一寧海東牟人號玉陽一云字玉陽號全陽子皇統二年母周氏夢紅霞遶身而生嘗氣絕仆地移時乃生

母驚問故曰但知熟寐不知其他後因悟生死之理拜  
重陽爲弟子後隱雲光洞臨危崖翹足駐立人目爲跌  
脚仙人承安中召見問先生事能前知何也曰鏡明能  
鑑物此自己靈明之妙耳一日謂弟子曰群仙約我矣  
因沐浴而逝元至元六年贈玉陽體玄廣度真人

劉真人名德仁滄州樂陵人始生有光照其室及長讀書  
稍通大義會宋靖康之亂徙居鹽山太平鄉一日有老  
叟授以道德要言投筆一枝而去自是玄學頓進從遊  
者曰廣直君乃演繹其義以示人大定初詔居京城天  
長觀賜號東岳真人有趙氏從孤崇德仁劾之孤數百  
鳴嘯赴火死人共神之卒後追封無憂普濟開明洞微

真人

郭志空章丘人嘗遇異人傳以秘法遂坐而不卧善運氣或化爲靈風而通透關節或化爲玉液而百病骨髓幻成變化非止一端

李笈濟南人聚學自給嘗臨安嘗詣慈淨寺過長橋見青木道人林下剥笋笈揖之道人因留食燒笋食之甚美道人忽不見笈頓覺身輕神逸行步如飛不復飲食去遊茅山及入蜀隱青城山後乘雲而去

張信真樂安人號希夷子母夢馭鶴仙人現空中遂感而娠太和中年十五參禮大通爲師戒行精嚴祛邪治疾大有靈應後於大長觀問天師授正一盟威秘錄賜號

真八年五十五當畫凌雲而去

呂道章垣曲人大定間爲縣吏夜夢神人告以修道寤即避役居洪慶觀道成治疾疫有可驗因修觀宇買木管州山放棹遠近不一皆有道章身畫之旣訖工乃解柁置黃河水面道章坐其上順流而去不知所終

嘗亘不知何所人嘗師丹陽馬仁長春丘處機自號寧真子人稱紫仙翁遊歷濟南抵鄒也釣臺太和間大雪夾餘亘不出十餘日人以爲死陰雪視之端坐儼然殊無寒餒色貞祐間元兵攻關峽軍民恐懼亘曰無妨已而果然哀宗幸蔡問曰天下城池陷盡此獨完何也僉以紫仙翁對一日亘羽化城陷矣

李志方安陽人初名益宣宗時爲戶部令史中原多故棄官隱隆慮山坐煉久之謁丘機處錫號重玄子嘗主天慶宮有萬鶴遶壇之異平生不作詩惟羽化時留贈曰四大旣還本一靈方到家白雲歸洞府明月落樓霞投筆而逝

元

丘處機登州棲霞人號長春子兒時有相者謂其當爲神僊宗伯九歲從重陽祖師遊居終南元太祖召至作醮焚簡飛空五鶴翔舞每有咨訪對宜不嗜殺人敬天勤民清心寡欲太祖喜令處太極宮賜以虎符九道家事一委處置卒年八十餘封長春演道主教真人有西遊

記行世

黃房公姓宋名有道字德芳號黃房公沔陽府人無雲則能以符行雲有雲則能披雲見斗故時號披雲真人一日遇丹陽授以金丹火候秘訣行之能令其身不死因遊東海世祖封通玄弘教披雲真人武宗加封通玄至道崇文明化大真人後莫知所終或云在燕之長春觀坐逝

李珣字雙玉蜀之崇慶州人得黃房公金丹之道即往邵武之武夷潛修金丹道將成乃回後至真州玉虛庵以道授張紫瓊而入青城山莫知所終

張模字君範號紫瓊真人饒州德興人後聞道改名道心

初太虛真人寓安仁熙春宮紫瓊求授金丹太虛弗與  
繼而適市見施丐錢三十文乃曰可授遂以金丹之道  
付之次年復會真州始全火候後以道授緣督子而隱  
去

趙友欽字緣督饒郡人幼遭劫火早有山林之趣凡天文  
經緯地理術數莫不精通及得紫瓊授以金丹大道乃  
搜群書經傳作三教一家之文名曰仙佛同源又作金  
丹問難等書行世後寓衡陽以金丹妙道授上陽子  
梅志仙檀州人戒行嚴峻修道黑山二十餘年遂能出神  
遠遊人莫能測有無根栢一株使其徒栽之即茂卧於  
石巖浹旬不食虎擾其旁年九十餘化

王當陽初遇異人授幻化之術後遊武當而歸於郡南平頂山建昇平道院修煉其中撰精語後端坐而化年九十餘

吉志通陝西郃陽人幼穎悟師喬潛道及潘清客博學多聞後居武當山十年不食火食但餌黃精蒼朮精神清徹行步如飛一日戒徒珍重修道言訖曲肱而逝時中統甲子歲也

莫月鼎歸安人名起炎初習舉業三試有司不利乃着道士服更號月鼎入青城山見徐無極授五雷法用是召雷雨破鬼魅動無不驗雖嬉笑怒罵皆若有神功之者世祖遣御史中丞崔或求異人於江南得之賞祿優厚

卒時書得已七十四年明月一日陰曆八月大地  
元明三界虛空透徹金華宋漁為傳

孫貴溪人少時入龍虎山為道士有相士謂曰神僊  
之輔也世祗時從天師張宗演入朝對語稱旨留待闕  
下世祖嘗親視龍虎風雨暴至留孫禱之即止授玄教  
宗師居崇真宮時天下大定與民休息留孫因論治道  
貴清淨之旨深契上衷加號大宗師武宗時升大真人  
尊號賜玄教大宗師王印卒年七十四

貴州人其母一百夢老人皓首長身冠劍莊偉告  
其子當寄母家明日州人見有青氣西北起自天  
乃生自幼不食酒肉長即辭親學

道師事太玄真人得其妙秘至元中封崇元廣化真人  
丞相安童病真人視之即愈大德間升仙而去

鄧牧錢塘人能通莊列諸書中筆述古作者皆餘統淵  
寶宮之超然館繼片不出四方名勝以文事請者交至  
非其人雖購之弗與大德間無疾而逝所著洞霄志愛  
稿行世

無爲子姪張謐字信甫居鄒之泰山自號如鳩夷子辰  
嘗伐父愛罪得原一日引刀截髮解故衣被布初信  
著行滕佩鉢裝掉臂出門徑去行至武當山拜張真人  
師焉危坐一榻脇不至席者三十年忽展趺坐衆而化  
人以爲尸解云

陳可復號雷谷定海人至元中得休生役雷術鄉大旱可  
復以法興雲雷電大作雨遂澆洽嘗主教鄞之玄妙觀  
時值中秋有方士賞月可復不與盟以墨水唎符頃即  
烏雲掩月而雨黑雨坐客衣盡溷衆知其所爲延之入  
席雲霧盡散月復朗然世祖召至京命治足疾乃試  
禁架術良愈復命止風祈雪皆立應後追封爲誠明翊  
教太極真人

王天助字致和定海之蓬萊鄉人學道於袁松溪至元間  
大旱書符咒之雨輒應聞於朝賜號爲太虛玄靜明妙  
真人

鍾道士象山人有法術歲大旱書符咒之雨輒應時以天

下方亂妖邪並興道士禁之即息呼召神將無不如命  
嘗使二童持劍入水斬鬼物持其首出人皆駭異又多  
戲術人至今能道之

洞真子涿州人姓丘壯年學道嘗遊碭山縣荆建聚仙宮  
北遊京師賜號寶巖大師道侶共號洞真子延祐中邀  
里中故舊會茶訖托以他往告別次日人見其向西去  
弟子闢戶視之已羽化矣

劉道秀安肅人少往盤谿山禮和光道人爲師後省家見  
庄客暴死與之符立活又劉氏妻暴死治之立愈嘗有  
群盜夜劫道秀一呼大風忽起盜皆潰去其靈異多類  
此

苑至果滿城人號悟真子至正丙申歲修行葛洪山漆峪  
中採薇而食年九十一日沐浴更衣謂衆曰吾於今日  
酉初刻去矣至期儼然端坐而卒

田志亨蠡吾人號通真子父母亡負土築墓一日舍妻子  
爲黃冠師卜居唐縣之磨巖坐栢樹下一磨石日丐食  
村落暮宿石上每有猛獸巨蛇直前皆俛而退里人異  
之爲剏觀居焉

許毛電白人自幼至老兩頰如丹鳳兩未作水旱將至時  
歲豐歉預以語人無一不驗一旦隱蹟莫知所之人以  
爲仙去

程守善狄道人含真養素禱雨立應所居萬壽觀枯槐復

茂至正中無疾而逝賜號通真子

麻衣先生元時居長清抱道潛真醉歌自娛嘗以藥愈人疾或預告人吉凶事無不驗聲若巨鐘走及奔馬年百餘歲嘗過石澗巖指謂門人曰此吾葬地也後預言其日而蛻化

景素陽襄陵道士也師事梁古賓居阜山道院元末兵亂鄉人俱匿山中惟素陽與師不去兵至求財不得欲殺古賓素陽曰師老矣願以身代兵即以刀斫素陽刀忽斷爲三兵皆驚異羅拜而去

二張仙翁一名崇真澤州人一名道溫京兆人同居澤州西上町社修真觀偕出東遊海島遇劉長生密傳妙法

復歸結社於觀既相繼沒瘞之同穴人傳皆仙去

鄔通微不知何許道士神清氣爽遊止無定常醉吟於道  
多遊豫章之間或數見其容益壯於前人莫之測也一  
日忽登市樓醉飲飛昇而去

上陽子姓陳江右廬陵人字觀吾元時得趙友欽金丹妙  
道精於其術四方受業者至衆有金丹大要行世其門  
人錄於後

至陽子田至齊

初陽子王氷田名舜民出入仕途三十年所寓以氷田自  
扁上陽與會於湓江任所遂授以金丹火

符之秘

一陽子潘太初廬山太平宮主上陽觀其間心見誠  
授以剝盡復生說且覽之曰一陽

碧陽子車蘭谷

居九宮山四十餘年上陽將祖師先天後天金丹之旨悉授之

宗陽子明素蟾

居九宮山本名宗慕白玉蟾爲人故改名明猶白也素猶玉也

玄陽子歐陽玉淵

居廬山上陽嘗語以坎離之道

谷陽子周允中

於湖入其字允中故取義曰陽曰谷其名一故取義曰陽

復陽子歐陽玉田

居廬山

全陽子周草牕

居廬山

心陽子余觀古

名舜申江右武寧人居九宮山上陽欲其先積德而後求金丹道

西陽子張性初

潯陽人上陽泊湓江樺徑初于家名曰玄白後復號曰西陽子

南陽子徐仁壽

居九宮山號南山所居扁曰如愚上陽示以清淨立心之要

南陽子張彥文

史隱修身以善自愛後來上陽授以金丹之道

來陽子李天求

上陽留秦淮時天求來請其道乃悉以授之

四陽子張工部

字毅夫號定齋上陽寓金陵定齋勇決求進遂以同陽子三字授之

得陽子夏彥文

錦城人通醫卜百家書尤堅於學道至正辛巳會上陽子滄浦達授以內外二丹號

得陽

子

扶陽子趙仁卿

濠州朝城人與上陽會於古洪案牘之暇同修身養生之道因號曰扶陽子

南陽子鄧養浩

古洪人父命名希孟自易曰顯上陽遊豫章授以青城秘蘊

致陽子趙伯庸

濮州朝城人上陽授以養生積德之說言下大悟

義陽子韓國儀

義陽人為之而有以爲之說也

真陽子真息

石刺會之商泰議公之子也上陽授以大易坎離之書後覽曰真陽

東陽子陶唐佐

江東東莞人至正末謁上陽於鶴見山上陽教以九還之道號曰東陽

詩道流

唐

司馬退之不知何所人爲道士以詩名

吳筠字貞節華陰人通經藝美文辭舉進士不中居南陽  
倚帝山玄宗遣使召見與語大悅勅待詔翰林獻玄綱  
三篇筠知天下將亂求還嵩山詔爲主道館大歷十三  
年卒弟子私謚爲宗元先生集十卷

常渠字京兆人少警悟工爲詩李白異之授以古樂府去  
爲道士不終更爲浮屠已而復冠德宗召對靈德殿答  
問風生帝聽之喜是歲至諫議大夫卒謚曰忠詩十卷  
行世

曹唐字堯賓桂州人爲道士太和中舉進士累官諸府從  
事因暴疾卒於家有集三卷

裴脩然楚州刺史思訓之子爲人恢諧強學不成一名善丹青解絲竹好酒工於詩去爲道士開元中嘗夜醉臨階犯禁乃爲詩曰遮莫鼕鼕鼓須傾滿滿盃金吾如借問但道玉山頽官不之罪

宋

李斯立居東山靈隱觀嘗從蘇軾遊年踰八袞作詩不凡凡如巖溜連雲凍溪梅帶雪香有意峯巒千嶂出無名花艸百般香皆佳句也

詩女冠

唐

李治藝文畧云李裕字季蘭女冠能詩者也高武仲中興

間氣集云季蘭嘗與諸賢會烏程縣開元時知河澗劉長卿有陰重疾季蘭乃笑之曰山氣日夕佳長卿對曰衆鳥欣有托舉坐大笑論者美之蓋上倣班姬則不足下比韓英則有餘者也

魚玄機咸通中西京咸宜觀女道士也字幼微善屬文其詩有綺陌春望遠瑤階秋興多又殷勤不得語紅淚一雙流又焚香登玉殿端簡禮金闕又雲情自鬱爭同慶仙貌長芳又勝花又大羅過却三千歲更向人間魁阮郎人皆稱之後以笞殺女婢抵死

元淳女道士也善詩寄洛中諸姊曰舊國經年別關河萬里思題詩憑鴈翼望月想娥媚白髮愁偏覺歸心憂獨

知誰憑亂離處掩泣向南枝

皇明

張正常洪武初太祖帥師取江西正常即遣人來見自後屢覲京師正常有道術常以符救故永壽宮井中飲者疾輒瘳詔作亭井上名曰太乙泉

王可交華亭人業耕釣一日擢舟入江忽見中流有彩舫載七道士遠聞有呼可交名者頃之舟近舫則呼可交登訪一道曰好骨相合爲仙一道與之二栗食之甘如飴命黃衣送上岸覓所乘舟不得乃在天台山瀑布寺前僧迎問之可交曰今早離家蓋三月三日僧言九月九日已半年餘矣後絕穀住四明山不出

周顥仙不知名自言南康建昌人元末往來南昌乞食暮宿閭閻下一日忽有異詞凡新官至必謁訴曰告太平及國初駕至南昌顥仙拜於道左言動殊異隨至金陵且云入火不熱試覆以巨氈積薪煨之火滅揭視寒氣凜然嘗以手畫地成圈曰破一桶成一桶時陳友諒據江南問可征否曰可果平之後辭入廬山莫知所之有御製傳

劉淵然賴人師事趙原陽於金精山得授諸階符籙及金火大丹之訣久之靈應嚮荅洪武癸酉召至京師賜號高道寵賚殊厚洪武初封真人賜二品銀章領天下道教卒年八十二比入歛凡七日端坐如生

鉄冠道人精數學以術謁太祖曰待公神采煥發時即受命應在千日內及上即位任鷄鳴寺預告僧云上將毀寺上知而惡之投之大通橋下而死後閔吏報是日道人出關矣先是梁國公藍玉携酒訪焉道人野服出迎王不悅爲對曰脚穿芒鞋迎客足下無禮道人即以所持否應曰手執柳瓢佐盞尊前不忠蓋已知其叛矣

冷謙字啓敬號龍陽子武陵人也元中統中與劉秉忠從海雲僧遊百家方術靡不洞習尤精於易後棄釋從儒遊雪川交趙孟頫及効李思訓畫遂以畫稱後入淮陽遇異人授中黃大丹至正間百餘歲矣顏如童避地金

陵賣藥於市神効駭人 太祖時同館人盡壁入內帑  
竊金事發被逮以足入瓶身漸隱至 御前問之瓶中  
應響 上怒碎瓶呼之片片皆應竟遁去不知所終  
柴道人善祈禱永樂中浙中大旱延至設齋壇三日後雷  
嚮一聲壇前二幡結成二龍頭雨如注西湖水涸其大  
半

任風子范縣人狀貌奇異少孤爲酒家傭遇異人授以仙  
術修煉於安平鎮之真武廟經旬不食雖隆冬單衣行  
乞於市氣體完粹雙目炯然言休咎皆應弘治甲子冬  
端坐而逝後有人見於遼陽意其爲口解云

張邈還名君實字玄一別字玄玄遼東義州人張仲安第

五子也丰姿魁偉龜形鶴骨大耳圓目鬚髮如戟頂作一髻自號保和容忍三丰子手執方尺寒暑惟衣一襖或處窮寂或遊市口浩浩自如旁若無人有問之者終日不荅一語及與論三教經書則吐辭滾滾皆本道德忠孝每遇事輒先知或三五日兩三月始一食然登山如飛或隆冬卧雪中約斲如常時人咸異之因呼爲張邈邈元末居寶鷄金臺觀嘗一日辭世而逝從者爲棺殮臨窆發視之復生乃入蜀抵秦遊襄鄧往來長安歷隴岷甘肅洪武初入武當登天柱峯徧歷名勝使弟子丘玄清住五龍廬秋雲住南巖劉古泉楊善登住紫霄乃自結草廬於展旗峯北曰遇真營草庵於土坡曰會

仙館令弟子周貞得守之洪武庚午拂袖長往不知所  
之明年太祖遣三山道士請造朝了不可見或曰  
住青州雲門洞永樂初遣給事中胡濙指揮楊永吉等  
物色之不得十年二月成祖爲書詔道士玄虛子  
往武當於玄菟遊處建道場焚書冀有聞焉不獲仍  
御製詩賜之有若遇真仙張有道爲言竚竚長相思  
之句天順末或隱或見上聞之封通微顯化真人後  
往來鶴鳴山半年不知所終

王士能初生海州後徙居濟寧生元至正甲辰入成化癸  
卯涉一百二十餘歲自幼慕長生之術遊四方入蜀聞  
雪山中有異人因往訪之及至見一老人被氍毹卧深

洞中石床上顏如嬰兒卧側惟輒麵一囊時取啖之或  
掬飲澗水一二升士能伏升不起遂依之朝夕左右居  
數日食盡老人出囊中麵遺之若澁不可下士能乃採  
山菓野菜自給如此三年老人苦其志一日謂曰子可  
語道矣因授之術且曰他日非其人勿輕授士能攝形  
鍊氣辭其師仍還濟寧僻居一處卧榻外無長物遂不  
火食或啖棗數枚或菜數莖飲水少許與人談皆靜坐  
寡欲之說其初州人不識也久而人漸異之指揮王宣  
原籍海州往訪得其姓名大驚曰吾祖嘗言叔祖諱士  
能者少好道出家不知所終翁是乎詢詢歷歷盡合迺  
日往候焉人慕而饋之拒不納又指揮朱顯欲業其術

士能謝之曰非吾徒也顯慚退因疏於朝 憲宗勅山東守臣以安車載入京 賜寶鑑而遺之當被 召時學士程敏政適以公事至因往問之士能曰老僕無能爲 朝廷過聽而召之僕豈知道但習靜日久今大敗吾事矣敏政問及元宋國初事士能曰一身之外皆非所知也又三年丙午蘇州楊南峯亦以使事過濟寧訪之時士能著素白衣坐一木榻因扣其所以壽士能曰無他但平生不食肉不娶妻不識數不爭氣而已雙槐歲抄謂弘治辛亥羽化之日今 東宮誕辰也又山東通志亦紀其事云

林復者字剛伯性穎敏甫成童五經四書 成誦弗忘年

十七出教家塾有清溪道士尚守謙延剛伯以儒書訓其徒剛伯心喜其閒靜請於父母許之遂托身爲弟子改名復真永樂中召至京修爲善書及永樂大典繼而住龍虎山號弘文輔道學士永樂九年選任道會復取赴京修道藏經宣德壬子秋卒鄉人吳訥銘其墓稱剛伯所學多有過人者

守法真人字浩然嘉定人父名海太常丞守法生有骨相始學易爲儒生常因病適一黃冠至識之遂勸之入道且曰從吾言疾即愈後當大振玄門從之疾果平已而從應元孫真人學又學於通妙邵真人盡得其術尋以龍虎張真人薦住持東岳廟未幾奉詔偕天下高道

校道藏經因禮部尚書胡濙薦擢神樂觀提點天順丁丑擢道錄司左演法兼朝天宮住持成化癸巳遷左正一明年封玄志守靜清虛高士尋封冲虛靜默悟法從道凝誠衍範顯教真人 賜誥命銀印并封贈其父母弘治改元授左正一特 命掌道錄事踰三年卒守法性質直謹厚尤以謙約自守頗精於術而尤本之以誠意以故用之有驗成化間大旱 命禱雨兩隨至明秋又旱禱亦應又明年旱禱不應守法篆符於鐵授中貴往投西湖之龍潭頃之西南雲起如鳥駐潭上俄見青蛇長數尺盤旋久之中貴未入城雷雨大至 上益喜賜第居之一日 召入便殿詢以天人感應之理對

曰惟德動天至誠感神此外無他道也 上深然之聞者服其正對

大瓢李先朝太和人有一僊人三四大瓢李其一馬郢中守閩人李公某其曾孫按家譜知其年百三十餘屢欲謁祖未能後以檄往入洞中稱孫拜牀下不休僊人不令止亦不言世系曰非是已今李公坐下李公欲屣棄袍笏挂搭相從僊人曰不可公貴人也自此皆榮擢第記吾言大司馬命不可拜後果累擢及拜大司馬公棄其章歸代者爲丁公汝璣庚戌之變喪元東市不然禍在李公矣

麴子李正德間太和山得道者以其辟穀但啜麥麵故名

荆藩永定王慕之遣十校移文叅藩董是山者禮聘  
以至寓靳武當宮衣破衲不食 王屢迎入宮祈長生  
訣皆不對但云儒者修身齊家此長生訣也 賜金帛  
甚厚皆委棄不顧已辭歸 王仍遣十校送之令索書  
報命至漢口卧舟中忽不見校奔至山見李坐捨身巖  
險絕處誦經遙爲泣拜索書又不見後復遣校至山則  
云李尸解矣校於歸途又見李持鉢行如飛亡何 王  
以于宗正條幾覆國始悟李語非漫然也

邵元節龍虎山道士嘉靖二年以符籙祈禳之術見 上  
試輒有驗累遷清微妙濟守靜修真凝玄衍範志默秉  
誠致一真人禮部尚書無管朝天顯靈濟三宮總領

道教事 賜蟒衣王帶壽八十二卒謚文康榮靖隆慶  
初年以 遣詔削奪

萬玉山名福敦羅田人幼攻舉子業已厭棄校塔山寺爲  
僧法名道幾寘解禪宗邑令徐召與語大器之命畜髮  
訪道徧遊終南義眉武夷天台懷玉王屋五嶽所過縉  
流羽客一語會心輒師事之迨歸已克然有得矣玉山  
善踵息鉤鍊不嗽秫麵益酪旁通風角堪輿奇門符水  
而尤聖於醫繪竹蘭清逸有韻其他譜琴擊劍蹴踘躡躡  
躡雜伎種種入能品語人禍福多奇中人問以故曰太  
清無纖雲誠則明矣年六十始娶妻生子朴正德乙亥  
性居霍山明年庚辰四月十日謂其主人江曰靈鶴夜

且至倘余假寐幸亟呼出戶也是夜風聲驟至瓦甍盡  
鳴主人舉炬視之則群鶴集竹稍仆壓牆屋呼玉山不  
應入戶窺之正襟跌坐而化矣年九十二嘉靖間陶仲  
文以其術獻世宗官三孤封真人上詢其師以玉  
山對壬寅夏六月誥贈清微神霄演法真人玉山子  
朴以掾史授牒吏部上命仲文引入將授太常官懇  
以疾辭

按仲文業以師說奏御即左道不肯自悖其本異乎吾  
儒之操戈入室者而玉山子朴稱疾辭官終不受仲文  
之援亦庶幾于知道者哉後子言策中鄉魁言書試  
俱以古文辭名於時則玉山公之食報誠亦孔厚矣

張金箔山西平陽人往視濟源秋水之蹟對水沉思曰不  
過術耳歸以後圃鑿池積水設機亦能溉物有一老道  
流來探張引觀池老道笑曰他日請遊寒寓亦可爲樂  
數日後遣二童子各騎龍邀張龍戾童鞭之始伏至一  
山老道危坐白老夫不欲涉塵世以二足置他所俟取  
至爲禮張見兩腿兀然倚壁老道以手拈之腿自輟及  
其體施禮畢謂張曰君後日必爲術累不若移家至此  
同享仙境之樂張謝不能老道囑童往移條忽間張之  
房業男女皆在目前張大驚俄頃失之止留張在荒山  
中尋路還家問前故皆曰未嘗少移高皇帝召問其  
術對曰臣能採蓮爲戲瓶中能出五色雲命爲之袖

中取一鐵瓶書五符與水投瓶中用火四灸初出如縷漸勃然五色雲迷布上下又以蓮子撒河中湏臾蓮花萬柄挺出復以紙剪作採蓮船技之美女無數俱在船採蓮競唱吳歌爲樂上不覺大笑忽然俱不見

陶真人名仲文湖廣人初爲海州庫大使嘉靖九年蒲陞赴京守選會 上求方士邵元節薦之遂入見一歲屢遷至神霄保國宣教道士未幾進神霄保國弘烈宣教振發通真忠孝秉一真人領道教事總各官觀住持知道錄司食正二品俸尋加少保禮部尚書餘如故我朝開國靖難勲戚內閣皆未有燕三孤者仲文獨以真人躋宗伯領三孤尋又改神霄紫府 範保國弘烈云

云知道錄事少師少傅兼少保兼禮部尚書如故勳階  
特光祿大夫柱國兼大學士俸尋進伯俸二十九年四  
月 上召吏部尚書夏邦謨至迎和門授 勅禮部尚  
書兼真人陶仲文禱雨濟旱力贊平獄特封爲恭誠伯  
賜誥歲祿一千二百石已而加祿一百石仲文疏辭  
上曰卿祝釐保國祈雨賜累累效職若鞠獄非卿職  
也果專恭太上盡誠玄修雖數爵亦未克酬今以平獄  
謝似非宜且准辭嘉靖末仲文死典禮極隆隆慶元年  
詔籍其家欲啓仲文屍示戮尋已遂戮其子陶倣於  
市仲文侍 世宗修玄幾二十年時內閣九卿及科道  
大小諸臣皆以進香有賞至是主事海瑞言之廷杖繫

獄

藍道行以箕仙術得幸嘉靖四十一年上廉知嚴世蕃貪肆而念嵩侍帷幄久不忍發一日命中使持片楮焚於鼎密書云世蕃惡毒上帝何不殛之道行潛匿御札以別楮詭仙筆報曰世蕃罪貫宜殛以在輦轂下恐震驚皇帝欲俟遣外戮爲葬粉耳上心益動欲遂無由道行素與御史鄒應龍友善陰以御札嗾之應龍又與太醫院吏目支秉忠交秉忠盡述世蕃賄惡狀應龍乃具疏上上命嵩致仕世蕃即訊下獄超遷通政司叅議道行爲世蕃所執下獄論死

裴慶蘇人初龍虎山二十七代天師某進香武當預戒道

士曰必我先焚香明晨關門奉啓然羣展皆有香卷焚  
天師怒繫道士將治之忽神座下一穢人出曰香自我  
焚道士何罪天師視其神采異常下拜之命釋道士穢  
人不顧而去曰我裴慶也當與君會姑蘇天師視其足  
不在地益異之徧追求之不可得抵姑蘇求裴僊皆曰  
此癩人常宿狗竇狗圈中臭不可聞且出乞食久矣天  
師遂登途忽纜夫中慶在焉天師長跽延之慶浴於泥  
淖中天師跽不已慶躍起踞上席大噉曰子何以有知  
耶故撓以鼻穢天師真舐之相與談終夜天師長跽涕  
泣願以瓢笠相從慶曰未也三年後俟我於廬峯頂上  
遂別去越三年慶果歸擔棄履數石壘一洞自入塞其

門火自內發焚訖烈焰中人猶見慶白鶴昇天天師俟於廬峯頂慶果至携手並去莫知所之

張無爲四十三代真人

廬大雅龍虎山人

周恩得錢塘人少穎悟從四十三代天師張宇初讀道家書永樂初召至京扈從北征宣德正統間累封崇教弘道高士卒年九十二贈通靈真人

董伯華成化間居泉州能呼風喚雨常賣雷畫一雷符賣錢一玄兒童買之藏符于手心開手雷即應聲而震後登清源山坐戶解

赤壯子自言晚唐時人年已六百歲嘉靖間隱于北京

西山

續文獻通考 卷之三百四十三